

डॉ० जितेन्द्र उधमपुरी

□ डॉ० सत्यपाल श्रीवत्स

अपने मधुर ते प्रेमी सभाऽ, आदर्श व्यहार ते दयानतदारी लेई प्रसिद्ध डॉ० जितेन्द्र उधमपुरी होर डोगरी ते हिन्दी दे प्रसिद्ध कवि ते साहित्यकार न। उधमपुरी हुंदा जन्म 9 नवम्बर 1944 ई० गी उधमपुर दे इक साधारण गुप्ता परिवार च होआ हा। इक सधारण प्रैमरी अध्यापक दे पद उप्परा अकाशवाणी जम्मू दे निदेशक दे पद तक पुज्जना डॉ० उधमपुरी हुंदी अनथक्क साधना दा गै नतीजा ऐ।

डॉ० उधमपुरी हुंदे पिता श्री जगन्नाथ गुप्ता ते स्वर्गीया माता श्रीमती कृष्णा देवी होरें बड़े धार्मिक विचारें दे दम्पती होने करी इंदे व्यक्तित्व दे निर्माण च अपनी ऐहम् भूमका नभाई ही। खास करियै इंदी स्वर्गीय माता होर इंदी पढ़ाई-लखाई ते तरक्की-बादधे ते मशहूर इन्सान बनने आस्तै म्हेशां भगवान् अगैं प्रार्थना करदियां रौहदियां हियां। डॉ० उधमपुरी हुंदा विस्वास ऐ जे-“अज्ज में जे किश बी आं ओह सब मेरी पूज्या माता दियें प्रार्थनें ते शीरबादें दा गै नतीजा ऐ।”

जिसलै उधमपुरी होर हल्लै १४ साल्लें दे गै हे तां इंदी माता हुंदा लम्मी बमारी बाद सुर्गवास होई गेआ हा, ओह कैंसर दियां मरीज हियां जिस कनै सारे परोआर उप्पर भैकर वज्रपात होई गेआ हा। अपनी धार्मिक ते पवित्तर विचारें आहली माऊ दी मौत कनै उधमपुरी हुंदे ते इंदे निक्के-निक्के पज्जे भ्राएं भैने उप्पर सदमे दा प्हाड़ गै डिग्गी पेआ हा। खास करियै बाल उधमपुरी ते इस लेई बी मता दुखी होआ हा की जे इसदी मां इसदे आस्तै प्रेरणा स्रोत बी ही। स'ब्बनीं भैने-भ्राएं च बड्डा होने करी उधमपुरी हुंदे उप्पर उंदे पालन-पोशन आस्तै अपने पिता कनै मदद करने दा भार बी आई पेआ हा ते इसदे कनै-कनै अपनी पढ़ाई बी जारी रक्खी ही। की जे उधमपुरी हुंदे हिरदे च उंदा कवि जेहड़ा विद्यमान हा इसलेई ओह बड़ा संवेदनशील हा। इसदे कनै-कनै उंदे च इक द्रिढ़ निश्चा बी मजूद हा। इयै ब'जा ही जे ओह अपने भैनें-भ्राएं दे पालन पोशन ते दिक्ख-भाल दे प्रति बिंद बी कुताही गवारा नेई हे करी सकदे। उनें अपनी आन्तरक इच्छा शक्ति गी जगाया ते उ'स्सी प्रबल कित्ता ते अपने परोआर उप्पर आए दे संकट अगैं हार नेई मनदे होई उसदा ब्हादरी कनै सामना करने दा प्रण पाई लेआ हा। उनें अपनी पढ़ाई जारी रक्खी

ते परोआर जने दियां जम्मावारियां बी नभानियां जारी रक्खियां। एह इक ध्रुव सच्च ऐ जे ओह इक चुनौती ते साहस आहला कम्म हा। ग'बरू उधमपुरी ने इस सचाई गी पूरी चाली समझी लेआ हा जे जींदा रौहना ऐ तां अपने परोआर उप्पर आई दी मसीबती दा हिम्मत कन्नै मकाबला करना गै पौना ऐ। एह सच्च ऐ जे उनें लक्क कस्सियै संघर्ष शुरू करी दिता हा। मां दे प्यार दे अभाव दी पीड़ ते मां-म्हेटर निक्के-निक्के भैनें-भ्राएं दे रोने-बिलखने गी दिक्खियै होने आहली पीड़ ने उधमपुरी हुंदे सुते दे कवि गी जगाने च अपनी ऐहम भूमका नभाई ही इनें दर्दनाक घरेलू हालातें गै अंदर द्रिढ़ आत्मशक्ति गी बी जगाया हा जिस कन्नै ओह संघर्ष करदे अपनी मञ्जल पासै बधन लगे हे। असल च उंदी द्रिढ़ आत्मशक्ति माऊ दे अभाव दी पीड़ उसदे कवि गी जगाने आस्तै ते इक खरा इन्सान बनने आस्तै गुप्त शीरबाद (blessing in disguise) साबत होई ही। आभाव ते गरीबी दा सामना करदे होई बी उनें अपनी पढ़ाई गै जारी नेई रक्खी बल्के चंगे अंक लेइयै दसमीं दा इम्तिहान बी पास करी लेआ ते जम्मू आइयै गांधी मैमोरियल साइंस कॉलेज च प्री यूनिवर्सिटी जमाता च दाखला बी लेई लेआ, पर आपने निक्के भैनें-भ्राएं दी दिक्ख-भाल दा ख्याल औंदे गै उनें अपनी पढ़ाई छोड़ियै अपने घर (उधमपुर) बापस चली जाना बेहतर समझेआ। उर्थें पुजदे गै इंदी किस्मत ने साथ दिता ते उधमपुर च गै सेबा दे उत्तरी कमाण्ड दे कार्यालय च सिविल कलर्क दे तौर पर नौकरी ल'ब्बी गई तां गै उनें 1987 च छपे दे अपने गजल संग्रह 'बस्ती-बस्ती' च माऊ दी अनमुल्ल ममता गी इस शेडर च इयां उजागर किता हा- "मेले च गुआचे दे गि'ल्लुए शा पुच्छ ॥" (सफा 23), जिस कन्नै उंदे घरै च इक मात्र कमाऊ पिता हुंदी बड़ी सीमत आमदनी च बिंद बाद्धा होआ। उनें दिनें उधमपुरी हुंदे पिता होर इक स्थानी बैंक च मलाजम हे।

उस नौकरी कन्नै उधमपुरी हुंदे च आत्म विश्वास ते उत्साह जागेआ ते कन्नै उं'दी द्रिढ़ इच्छाशक्ति च बी होर मता बाद्धा होआ। उसलै उनें होर मती समझदारी ते योजनाबद्ध तरीके कन्नै अगें बधने दी योजना बनाई। क्लर्की दी नौकरी करदे होई उनें अपनी बी.ए. तक दी पढ़ाई बदस्तूर जारी रक्खी ते जिसलै चंगे अंक लेइयै बी.ए. पास करी लेई तां क्लर्की दी नौकरी छोड़ी ते जम्मू आइयै बी.एड. कॉलेज च दाखला लेई लेआ ते खुश किस्मती कन्नै उनेंगी बिनायक धर्मशाला गुमट बजार च बगैर कराये दे इक कमरा बी रौहने आस्तै मिली गोआ हा।

1969 च बी.एड. पास करने दे तुरन्त बाद उधमपुरी होरें गी जम्मू दे रणवीर हायर सैकण्डरी स्कूल च अध्यापक दी नौकरी बी ल'ब्बी गई ही, पर उर्थें किश म्हीने नौकरी करने दे परैन्त इस पक्के इरादे आहले इन्सान ने अपना उच्चा उद्देश हासल करने

दी तांहग कन्नै जम्मू-कश्मीरा दी कल्चरल अकैडमी दी डिक्शनरी सैक्शन बिच्च बतौर जूनियर एडिटर दे अपनी नियुक्ति करोआने च कामयाबी हासल करी लेई।

होर मती तरीफ आहली गल्ल ऐ जे जितेन्द्र उधमपुरी होरें इर्थें बी नौकरी दे कन्नै-कन्नै अपनी पढ़ाई जारी रक्खी ते उर्दू हिन्दी ते डोगरी च ऑनर्स दियां परीक्षां पास करने दे बाद हिंदी ते उर्दू दौनीं बिशें च ते कन्नै इतिहास बिच्च एम.ए. दियां डिगरियां प्राप्त करी लेइयां ते इसदे बाद एम.एड. दी परीक्षा बी पास करी लेई ते फही किश ब'रें दे अन्तराल दे बाद पी.एच.डी. बी करी लेई। इस थमां उधमपुरी हुंदी बुद्धिमत्ता ते द्रिढ़ इच्छा शक्ति ते कर्मठता दा परिचे आसानी कन्नै मिली सकदा ऐ।

कल्चरल अकैडमी च 1976 तक नौकरी करने दे बाद उधमपुरी होरें अपनी उच्च-कांक्षा गी इक होर झटका दिता ते रेडियो कश्मीर जम्मू च प्रोड्यूसर ऑफ एजुकेशन ब्राडकास्ट दी पोस्ट हासल करी लेई। सन् 1990 च डॉ० जितेन्द्र उधमपुरी हुंदी अकाशवाणी च सहायक निदेशक दे तौर पर तरक्की होई ते सन् 1995 च फही तरक्की दा झूटा लगा ते डॉ० उधमपुरी होरें गी निदेशक बनाइयै आकाशवाणी दे कठुआ केन्द्र च भेजी दिता ते उसदे इक ब'रें दे परैन्त धर्मशाला (हिमाचल प्रदेश) केन्द्र च तबदील करी दिता ते फही सन् 1999 दे नवम्बर म्हीनै च उत्थुआं बी तबदील करियै जम्मू केन्द्र च लेई आंदा ते हून डॉ० उधमपुरी होर इससै केन्द्र दे प्रशासन गी बड़ी मैहनत ते दयानतदारी कन्नै चलाऽ करदे न। मेद ऐ इंदे काबल ते जोग निदेशन च इस केन्द्र दियां गतिविधियां जम्मू दी जनता दियें तांहगें ते मेदें दे अनुकूल होडन।

उप्पर दिते दे ब्योरे कोला एह गल्ल भलेआं साफ होई जंदी ऐ जे डॉ० उधमपुरी होरें जेकर अकाशवाणी दे निदेशक दे औहदे तक तरक्की किती ऐ तां एह उंदी अपनी कठन मैहनत, दयानतदारी, अगें बधने दी तांहग ते उच्चे जीवन मुल्लें गी अपने जीवन च तुआरने दे द्रिढ़ निश्चे दा फल ऐ। पञ्चतन्त्र च लिखे दा ऐ जे-“उद्योगिनं पुरुष सिंह मुपैति लक्ष्मी” अर्थात् उधमी शेर-माहनू कोल लक्ष्मी द्रौड्दी आई जंदी ऐ। उप्पर जियां दसैआ ऐ जे डॉ० उधमपुरी होरें कठन साधना करियै केई परीक्षां पास कितियां। उनें डिगरियें गी हासल करने दा सिद्धा असर डॉ० उधमपुरी हुंदे बौद्धिक स्तर पर ते पेआ गै हा बो कन्नै-कन्नै साहित्यक रुचि बी मती गैहरी होई गई ही। इनें हिन्दी, अंग्रेजी, उर्दू ते पञ्जाबी दे साहित्य दा मती गम्भीरता कन्नै अध्ययन करना शुरू करी दिता हा ते उर्दू दे मशहूर कवि मिर्जा गालिब, डॉ० इकबाल, फैज एहमद फैज, फिराक गौरखपुरी, जौक, जोश मलीहावादी ते हिन्दी दे कवि सूर्यकान्त त्रिपाठी निराला, महादेवी वर्मा, सुमित्रानन्दन पन्त, जयशंकर प्रसाद बगैरा गी अपना आदर्श मन्थियै अपने कवि-कर्म आस्तै

इंदे कोला मनचाही प्रेरणा लेई। असल च डॉ० उधमपुरी हुंदे अन्दर जेहड़ा संवेदनशील कवि सुते दा हा उन्न उठ्ठने आस्तै झमानियां मारनियां ते इंदे विद्यार्थी जीवन दिया लौहकिया बरेसा च गै शुरू करी दित्तियां हां, पर इनें जिसलै उप्पर बर्णत कवियें दे काव्य-साहित्य गी बड़ी संजीदगी कन्नै पढ़ेआ तां उसलै इंदा कवि बाहर आई गोआ हा। नतीजा एह होआ हा जे उधमपुरी होरें शुरू शुरू च जेहड़ियां उर्दू-गजलां लिखियां हां उंदी मकबूलियत दा एह सबूत ऐ जे पंजाब थमां निकलने आहले दैनक मलाप ते प्रताप जनेह मशहूर समाचार पत्रें च छपन लगियां हां ते इंदियें हिंदी कवतें दा स्तर बी दिन प्रतिदिन उच्चा होन लगा हा उंदे च काव्यत्व दा नखार ते सन्हाकड़ापन बधन लगी पेआ हा। हून इंदियां उर्दू ते हिन्दी दियां कवतां इंदे विद्यार्थी जीवन च रची दियें कवतें कोला मतियां उच्च स्तर दियां हां ते इस चाल्ली इंदा थाहर स्थानी उर्दू ते हिन्दी दे चंगे कवियें च बनन लगी पेआ हा। नतीजे दे तौर पर “फूल उदास हैं” ते “दे दो इक बसन्त” शीर्शक कन्नै दो हिन्दी कवता संग्रह समाज दे सामनै आए, जिंदी हिन्दी प्रेमियें दिल खोहलियै प्रशंसा कित्ती। ‘फूल उदास हैं’ गी रियास्ती कल्चरल अकैडमी ने पुरस्कृत बी कित्ता हा।

इंदे परैंत डॉ० उधमपुरी होरें महाराष्ट्र दे भुंचाल दे संदर्भ च लिखे दा ‘वह इक दिन’ शीर्शक आला नाटक बी पाठकें दे सामनै आंदा हा, जिसदा 1993 च अभिनव थियेटर, जम्मू च सफल मंचन बी होआ हा।

हिन्दी च कवता लिखने दी इन्नी चंगी म्हारत रक्खने दे बावजूद इक दिन यकदम डॉ० उधमपुरी होरें अपनी मां बोल्ली डोगरी पाससै मूंह मोड़ी लेआं हा, भाएं उनें हिन्दी कन्नै बी अपना नाता बदस्तूर जारी रक्खेआ। उंदे डोगरी पाससै मुड़ने गी केइयें मित्तरे-दोस्तें घर परतोने (Home Coming) दी संज्ञा दित्ती ही, पर होंदा उ‘ऐ जेहड़ा खुदा गी मंजूर होऐ। असल च डुग्गर ते मां बोल्ली डोगरी, कन्नै अनसंभ प्यार गै उधमपुरी होरें गी डोगरी पाससै खिच्ची लेई आया हा। सन् 1987 च छपे दे गजल संग्रह ‘बस्ती-बस्ती’ दे एह बन्द इंदे इस प्यार दी चंगी चाल्ली अकासी करदे न।

—“अक्खियें च डुग्गर ऐ, मनै इच डोगरी,
तुप्पना ऐ रूप इन्दा डोगरें च तुप्प।
भाशा कन्नै होंदे किश अनवृष्ट रिस्ते,
चलना ऐ एदी लोई होऐ न्हेरा गुप्प (सफा, 23)”
इस मिट्टी शा बद्ध पवित्र होर निं कोई थाहर।
अगग बर्हांदी रुतें-इच ऐ इयै मेरी छां (दिल दरया खाली खाली सफा-30)

इस बारे च एह आखना पौग जे चंगे कम्म करोआने लेई प्रेरक शक्ति ते उ‘ऐ गै, पर एह बी इक तत्थ ऐ जे ओह शक्ति म्हेशां उस्सै माहनु कवि जां लेखक गी प्रेरणा दिंदी ऐ जिसदे च उसदे प्रति अगाध आस्था ते अपने कर्तव्य दे प्रति पूरी-पूरी निश्कपटता ते दयानतदारी होऐ। भगवान् उप्पर अपनी पूरी आस्था रक्खने आहले कवि उधमपुरी होरें म्हेशां इस बारे च पूरी चाल्ली उस प्रेरक शक्ति गी गै श्रेय दित्ता ते कन्नै उसदा धन्नवाद बी कित्ता। बस इंदी इस शरधा-भावना ने गै इनेंगी डोगरी काव्य साहित्य दे गासै पर इक तारे आहला लेखा चमकाना शुरू करी दित्ता हा। नतीजे दे तौर पर इस ग‘बरू कवि ने इक दे बाद इक करियै अपने संग्रह प्रकाशत कित्ते। इंदे च ‘पीड़ें दी बरात’ ‘बस्ती-बस्ती’ ते ‘दिल दरया खाली-खाली’ शीर्शक कन्नै गजल संग्रह बी न। इंदे इलावा डॉ० उधमपुरी होरें ‘डोगरी साहित्य दा इतिहास’ लिखियै डोगरी दे गद्य लेखक दे रूप च बी अपना सिक्का जमाइयै सारें गी चर्ज-चकत करी दित्ता हा।

डॉ० उधमपुरी डोगरी दे पैहले कवि न जिनें ‘जित्तो’ महाकाव्य रचियै डोगरी कवियें च आपना खास मकाम बनाया हा। इंदी इस रचना गी बी रियासती कल्चरल अकैडमी ने पुरस्कृत कित्ता हा। ‘गीत गंगा’ कवि दे भक्तिभाव ते आध्यात्म संबन्धी गीतें दा बड़ा मनभावना गीत संग्रह ऐ। इंदे इलावा डॉ० उधमपुरी होरें इक्की नामवर रूसी शायरें दियें कुं‘जे कवतें दे भावात्मक अनुवाद दे दो संग्रह बी प्रकाशत कित्ते दे न। एह डोगरी अनुवाद बी सराहनै जोगग न।

कवि उधमपुरी हुंदी साधना दी एह खास बशेशता ऐ जे एह जिस रचना दी बी योजना बनांदे न उ‘स्सी मकम्मल करने आस्तै पूरे मनोयोग, समर्पणभाव ते लगन कन्नै कम्म लेंदे न। इस्सै करी ओह भाएं महाकाव्य जित्तो होऐ ते भाएं गीत गंगा ते भाएं चाननी बगैरा रचना होन उंदे च कोई कमी दूढने आस्तै बड़े जागरूक समालोचक गी बी अपना मत्था भलेआं रगड़ियै बी मुश्कल कन्नै गै कोई दोश नजर आँदा ऐ, उआं कोई बी रचना अपवाद कोला खाल्ली नेई होंदी।

कवि उधमपुरी हुंदा आखना ऐ जे जिसलै उनें पैहली बारी अपनी हिन्दी कवता लिखियै अपने मास्टरें गी ते जमातियें गी सनाई ही तां उनें गी चर्ज बी होआ हा ते खुशी बी। ते फही केह हा ओह स‘ब्बै इंदियां कवतां मते ध्यान ते रुचि कन्नै सुनदे होंदे हे ते इनेंगी मती दाद दिन्दे हे। इन्ना गै नेई इस होनहार कवि गी अगगें लिखने आस्तै प्रेरत ते उत्साहत बी करदे हे। इयां प्रेरत होइयै कवि उधमपुरी होरें अपने कवि कर्म दी बड़ी लगन ते निश्ठा कन्नै साधना शुरू करी दित्ती ही। इस्सै अंदबी सफर

च कवि उधमपुरी गी प्रो० रामनाथ शास्त्री, दीनू भाई पंत, केहरि सिंह मधुकर ते पद्मा सचदेव जनेह कवि ते कवयित्रिये दी संगति बी मिली, जिंदे कोला इंदी कवि संवेदना गी होर मती प्रेरणा ते प्रोत्साहन मिलेआ। इनें बड्डे कविये इंदियां कवतां उच्च स्तर दियां मत्रिये उंदी दिल खोहलिये प्रशंसा कित्ती ही। इंदिये कवते च नेके समाजक सरोकारे ते समस्ये दी सहेई तर्जमानी कित्ती गोदी ऐ। कवि दिये ने 'इये कवते च आए दे समाज दी भलाई आस्तै सुच्चे ख्यालाते गी दिखदे होई गै इ'नें गी संगीत बद्ध करिये आकाशवाणी उप्परा गाए-बगाए प्रसारत कित्ता जंदा ऐ। एह गल्ल भलेआं साफ ऐ जे कवि उधमपुरी च आधुनक डोगरी कवता च पुनर्नवीनीकरण दी पूरी-पूरी तांहग ऐ। एह बी सच्च ऐ जे इंदिये कवते च वर्तमान पूरे जोश कनै झलकदा ऐ जेहड़ा चंगे भविष्य दा रस्ता बी सझांदा ऐ। एह सच्च गै कवि उधमपुरी दे काव्य-सिर्जना दी इक काबले तरीफ उपलब्धि ऐ। इक होर बडे म्हत्तव आहला तत्थ एह जे कवि उधमपुरी ने अपनी मां दी बे-मौकी मौत दे बाद अपने भैने-भ्राएं कनै जिस पीड़ ते बेदन गी झल्लेआ हा ओह भोगे दा यथार्थ कौड़ी ते मिट्ठी अनुभूति बनिये इंदिये रचनें च असेंगी साफ-साफ झांकदा नजर औंदा ऐ।

कवि उधमपुरी हुंदी रचना 'चाननी' इक नेहा नोखा लघुकाव्य ऐ जिस बिच्च आद कोला अंत तक इकै लम्मी कवता चलदी ऐ, जिस दियां 400 पंक्तियां न। इस रचना पर असें गी हिन्दी दे युग प्रवर्तक कवि जयशंकर प्रसाद दे मशहूर छायावादी लघुकाव्य 'अश्रु' दा स्पष्ट प्रभाव ल'बदा ऐ। इस रचना च बिम्ब योजना ते प्रतीक विधान-इस्सी इक उच्च स्तर रचना सिद्ध करदे न। 1970 ई० कोला लेइयै सन् 1980 ई० तक कवि उधमपुरी ने अपने पंज कवता-संग्रह छापे हे।

जिंदा डोगरी प्रेमिये तैहदिल कनै सुआगत कित्ता हा। इंदे च 'चेते दे सूर्यमुखी' इंदा दूआ कवता संग्रह ऐ जेहड़ा सन् 1976 च छपेआ हा। इसदी भूमका बिच्च प्रो० सुभाष भारद्वाज ने आखेआ हा-"इनें कवते गी पढ़ने दे बाद में पूरे विश्वास कनै आखी सकना जे जेकर अज्ज नेई तां कल्ल कवि उधमपुरी गी डोगरी कवता दा चराग मन्नेआ जाग।" इंदे 'बनजारा' ते 'किश कलियां तेरे नां' कवता संग्रह बी डुग्गर समाज च बडे मकबूल होए ते इंदी सारे खूब तरीफ कित्ती ही। 'किश कलियां तेरे नां' कवता संग्रह दी डॉ० ओ.पी. शर्मा सारथी द्वारा लिखी दी 9 पेजी भूमका इस संग्रह दिये कवते दे स्तरीय काव्यत्व दे म्हत्तव गी सिद्ध करने आहला इक प्रमाणक दस्तावेज ऐ।

कवि दे कवता संग्रह-'इक शैहर जादे दा' गी सन् 1981 च साहित्य अकादमी, दिल्ली ने पुरस्कृत कित्ता हा। असल च इस कवता संग्रह दियां कवतां बी

बडे उच्च स्तर दियां न। इस्से करी आलोचके इस संग्रह दी रज्जिये प्रशंसा कित्ती ही। इनें तक जे हिन्दी दे मशहूर लेखक विष्णु प्रभाकर होरे बी इसदी दिल खोहलिये प्रशंसा कित्ती ही। जाने-माने भाशा विज्ञानक डॉ० सिद्देश्वर वर्मा ने बी डॉ० उधमपुरी दियां किश कवतां पढ़िये बड़ी प्रसन्नता जाहर कित्ती ही ते कनै डोगरी दे इस होनहार कवि गी चंडीगढ़ थमां अपना शीरवाद बी भेजेआ हा।

जिसलै अस कवि उधमपुरी हुंदे अज्ज तोड़ी सिरजत कवि कर्म गी समूहक रूप (Intotality) च दिक्खनेआं ते उसदा जायजा लेइयै परिणाम कड्डने आं जां लेखा-जोखा करने आं तां एह तथ्य स्पष्ट होई जंदा ऐ जे कवि उधमपुरी असल च वेदना (पीड़) दा कवि ऐ। एह इक सर्वमाण्य तत्थ ऐ जे पीड़ा दर्द जां बेदन दी व्याख्या जां बर्णन जां अपनी रचना च उसदा चित्रण उ'ऐ कवि जां लेखक करी सकदा ऐ जिन् उ'स्सी भोगे दा होए। बिना भोगे दे कोई बी यथार्थ साहित्य च सार्वभौम बनिये नेई उभरी सकदा ते भोगे दे यथार्थ दी अकासी करने आहली रचना गै-'सत्यं, शिवं ते सुन्दरम्' ते 'श्रेय ते प्रेम' दी तर्जमानी करी सकदी ऐ, ते इस्से करी चिरन्तनता दी बी हक्कदार उ'ऐ गै होन्दी ऐ ते कनै उस्से च गै-"क्षणे क्षणे यन्नवता मुपैति तदेव रूप रमणीय ताया" (अर्थात् जिस रचना च खिन-खिन दे बाद होर-होर नमांपन ल'बबै उऐ रमणीक (खूबसूरत) खुआने दी हक्कदार होंदी ऐ ते पही दर्द ते बेदन दी अकासी करने आहली रचना साहित्य रसके गी रसा स्वादन करांदे होई नंद प्राप्त करांदी ऐ। इस बारे च इक पश्चमी विद्वान् दा एह कथन बड़ा गै सार्थक ऐ-"Our sweetest songs are those which tell our sadest thoughts." गल्ल स्पष्ट ऐ sadest thoughts अर्थात् दुआसी भरोचे विचार गै पीड़ जां बेदन दी तर्जमानी करदे न ते उंदे बिच्चा गै काव्य-रस दी मिठास भरोचे गीत कुडिठिये काव्य रसके गी नंद दिंदे न। इस बारे च हिन्दी दे प्रसिद्ध कवि सुमित्रानन्दन पन्त हुंदा एह आखना बड़ा गै अनुकूल ऐ-

"वियोगी होगा पहला कवि आह से निकला होगा गान।"

फूट कर आँखों से चुपचाप वही होगी कविता अनजान ॥

वियोगी कवि दे अत्थरुएं कनै निकली दी कवता च बेदन, तड़फ, पीड़, मिट्ठी चुभन ते हिरदे स्पर्शां भाव सब किश होंदा ऐ। महारिशि वाल्मीकि ने अपने शिष्ये कनै नदी च न्हौन जंदे मौके जिसलै इक-दूए गी प्यार कनै चुल-बुलियां करदे क्राँच पक्खरुएं दे जोड़े बिच्चा नर पक्खरु गी इक शकारी दे तीरे दा नशाना बनिये गरी जाने दे परेंत मादा पक्खरु गी उसदे कोल तरसदे-तड़फदे दिक्खेआ हा तां उसदिये अक्खीं चा बगी पे हे आपमुहारे अत्थरुं ते उसदे भावुक हिरदे चा आप मुहारी

फुट्टी पेई ही एह कवता-

“मा निषक्द प्रतिष्ठा त्वमगमाः शाश्वतीः समाः।

यत्क्रौंच मिथुना दे कमवधीः काम मोहितम्॥”

अर्थात् ए शकारी, औने आहले समें च तेरी कदैं बी कुतै मान-इज्जत नेई होगी की जे तू काम मोहत होए दे इनें पक्खरूए दे जोड़े बिच्चा इक गी मारी दिता ऐ इयां कवि दा शोक-श्लोक अर्थात् कवता (शोक श्लोकत्व मागतः) बनी गोआ हा ते इयै संसार दी पैहली कवता ही इस चर्चा दी लोई च जिसलै अस उधमपुरी दियें औसत कवतें उप्पर गौर करने आं तां एह तत्थ साफ होई जंदा ऐ जे कवि दियें 90% कोला बी मतियें कवतें ते गजलें च पीड़ जां दर्द दी नेकें रूपें च अकासी होई दी ऐ। इसै करी में अपने मित्तर ओ.पी. शर्मा सारथी दी इस राउ कनै पूरी चाली सैहमत आं-“भरेआ-भरोया दर्द दा साज ऐ जितेन्द्र उधमपुरी, ते उस साज बिच्चा निकलै करदियां धुनां न-पीड़ें दी बरात (गजल संग्रह) इनें धुनें दा हुस्न मते रंगें दे कन्वास बनांदा निखरै करदा ऐ। इक धुन विराग दी, दूई निराशावादी, त्री-संवेदना दी, चौथी जिसमानी दुख ते उस थमां अगली रूह दी जलन, धुखन ते सरबस्स दे निस्वार्थ प्यार बिच्च विलय होने दियां धुनां। गजल संग्रह संभी जन्दा ऐ पर किश मजाजी ते किश हकीकी दर्द दे नगमे दिमाग दी रंगें च, रोम-रोम ते जोड़-जोड़ बिच्च, शरीर दी गर्मी तें आत्मा दी विशालता बिच्च गूजदे रौहदे न।”

चू के ओ.पी. सारथी होर अप्पू बी इक उच्चस्तर दे कवि ते गजलकार न इस लेई उंदी लेखनी द्वारा कवि उधमपुरी हुंदियें गजलें दा इस चाल्ली मूल्यांकन होना बशेश अर्थ रखदा ऐ। दूए लफ्जें च नेहा मूल्यांकन कवि उधमपुरी दी कवि-सर्जना दे म्हत्तव गी होर मता बधाइयै समाज दे सामनै पेश करने आहला काबले तरीफ उपक्रम ऐ। सारथी हुंदे इस मूल्यांकन कोला एह साफ होई जंदा ऐ जे पीड़ कवि उधमपुरी दी संवेदन शीलता दा पर्याय गै बनी गेदी ऐ।

कवि उधमपुरी गी अपनी पीड़ा दी अनुभूति सर्वव्यापी से ई होंदी ऐ अर्थात् ओह व्यक्ति कोला निकलियै समष्टि दा रूप लेई लैंदी ऐ तां गै ओह आखदा ऐ-

“अज बी गरीब नंगा, करसान भुक्खा ऐ।

कु न फसल खाई गोआ ऐ, खेतै खड़ी।।

(बस्ती-बस्ती सफा 90)'

की जे अज्ज बी समाज च गरीब-मजदूर करसान दा कुसै ते कुसै रूप च शोशन होआ करदा ऐ इस लेई कवि दा इसदे बरुद्ध पीड़ भरोचा आक्रोश ते विद्रोह ऐ वेदना दे इस कवि दा। दूए पासै कवि गी अज्ज दे समाज दे औसत माहनुएं दे स्वार्थी रबेइये गी मसूस करियै बी पीड़ा दी अनुभूति होन्दी ऐ जेहड़ी उस दी पीड़ दे दुए पैहलू गी उजागर करदी ऐ-

“अपनी-अपनी भारी लभै।

कु न जानै ए पीड़ पराई।।

(पीड़ें दी बरात सफा 25)

कदैं-कदैं एकांत खिनें च कवि पीड़ गी बड़ी शिहत कनै मसूस करदा ऐ। पर उसलै उ'स्सी अपने सच्चे हमदर्द ते मात्तर दिखावा करने आहले सज्जन-सरबन्धियें दी चंगी पन्छान बी होई जंदी ऐ ते इयां दुद्ध ते दुद्ध ते पानी ते पानी भलेआं साफ होइयै सामनै आई जंदा ऐ इयां पीड़ दा व्यापक रूप इस लेई गुप्त शीरवाद (blessing in disguise) बी साबत होई जंदा ऐ-

‘भेत हे जिन्ने सारे खु'ल्ले,

अत्थरूं ब'न्न त्रोड़ी डु'ल्ले।

बद बख्ती इच कोई निं अपना,

दिन जो बदले यार बी भुल्ले।

किरी गे रिश्ते-नाते इयां,

पतझड़ें इच पत्तर डु'ल्ले।

पीड़ रातभर मच्छरी इयां,

सब जख्में दे टांके खु'ल्ले।

(पीड़ें दी बरात सफा 39)

कवि दे अन्दर सैहन शक्ति ते धीरज दा संयम इन्ना ऐ जे ओह अपनी पीड़ गी जरने ते उस उप्पर काबू पाने दी पूरी सकत रखदा ऐ भाएं ओह पही बी गाहे-बगाहे अपना रंग ते करिश्मा दसदी गै रौहदी ऐ-

“बड़ी मुश्कलें पीड़ सुआली,

चुप-चपीते बिट-बिट दिक्खै।

(उ'ए सफा-14)

पर कदैं-कदैं ओह पीड़ इन्नी शिहत कनै बे-काबू होई जंदी ऐ जे कवि उस

अगँ हार जन मन्नी लेंदा ऐ-

'जखमै उप्पर जखम, कोई रफू करै कियां? कोई टल्ली पा कियां।

(चेतें दे सूरजमुखी-सफा 36)

पीड़ें-चुभैं सैंसैं झुरें/दे थल्लै दबोई जंदा ऐ/रोम-रोम मेरा।

(किश कलियां तेरे नां, सफा-18)

पर इसदे बावजूद उधमपुरी हुंदा द्रिष्टीकोण आशावादी ते प्रगतिवादी होने करी ओह अनसम्भ पीड़ां ते दुख-कसाले दे जैहर पीयै बी शायद अपने अंदर दे शिवत्व गी जगाइयै नीलकण्ठ रूप होइयै जीन-जीने दी पूरी-पूरी तांहग गै नेई रखदा ऐ पर इक जबरदस्त सकत बी रखदा ऐ-

घुट-घुट करी/एह सारा जैहर/पीना ऐ-में अज्जे जीना ऐ/में अजें/होर जीना ऐ।

(चेतें दे सूरज मुखी - सफा-38)

हर पुन्नेआ मस्सेआ गी पुच्छै,

तेरा सालू कदूं धनोगी ॥

अज्ज भाएं निं लोड़ ऐ मेरी।

कल्ल ते तुम्मी तुपदी होगी। (बस्ती-बस्ती, सफा-1)

कवि दे अंदर इस गल्ला दा बी पीड़ भरोचा शिकवा ऐ जे उन्न अपने लोकें दे दर्द ते पीड़ें कनै पूरी सांझ कित्ती पर जिसलै उसदी बारी आई तां उ'स्सी सारे धोखा देई गे :-

'में दर्द बंडाया सबनें दा,

पर खाल्ली अपनी झोली ऐ।

सब संगी साथी झूठे न,

ए जिंदड़ी ऐहमें रोली ऐ'।

(दिल दरया खाली-खाली सफा-11)

मेरी रौनकां बंडी लेइयां मित्तरें ते किश बखलें बी।

दुक्खें दी नेई होई भ्याली कदें नी मेरे भ्यालें च ॥

(पीड़ें दी बरात, सफा 61)

कवि मित्तरें-दोस्तें, साक-सरबन्धियें गी परखने दे परेंत खीर इ'स्सै नतीजे पर पुजदा ऐ जे-ओह जानो जेकर मेरा कुसै साथ नेई दिता तां बी केह फिकर ऐ। उसदे कोल पीड़ा दा अनसंभ खजाना ऐ जेहड़ा उ'स्सी मसां-मसां ल'ब्बा हा इस लेई हून उसने 'इस कनै गै पूरी चाल्ली समझौता करी लेदा ऐ ते ओह बी इस दे आस्तै ने'ई कामधेनु बनी गेदी ऐ, जेहड़ी इस लेई हीरे-मोती बी बनी जंदी ऐ ते नोटें दी थ'ब्बी बी। ते पही उ'स्सी जदूं बी भुक्ख लगदी ऐ तां एह उसदे आस्तै भुज्जे दे छोलें आहला लेखा बनी जंदी ऐ :-

मसां-मसां एह ल'ब्बी पीड़,

मन डीठी में दब्बी पीड़ ॥

भुक्ख जदूं बी लगी बझोना,

छोलें साई चब्बी पीड़ ॥

(दिल दरया खाली खाली सफा-100)

असल च कवि उधमपुरी हुंदी पीड़ उंदे आस्तै नां कोई रोग ऐ ते नां गै उंदे कविकर्म च औने आहली रुकावट बल्के ओह ते उस कनै आत्मसात् होइयै उंदे कवि-कर्म आस्तै सैहयोगन जां उंदे कर्म दां हुनर जां कला बनी गेदी ऐ। इससै लेई ओह पीड़ गी केई बारी प्रतीकात्मक ढंग कनै बरतियै इक गजल दियें दीं पंक्तियें च सोहनी मैहवाल जनेह प्रेमी जोड़े दी पूरी प्रेम कहानी समेटने दी कला दे माहर होने दा सबूत दिंदे न :-

चन्हांऽ बिच्च डुब्बी ते कंधें चनोई।

तां आशकें दी एह कहानी लखोई ॥ (पीड़ें दी बरात, सफा-71)

एह बी इक काबले तरीफ गल्ल ऐ जे पीड़ ते दर्द गी अपने जीवन दा सार मन्निथै कवि-कर्म दे पैंडे तैह करने आहले कवि उधमपुरी होर अपने हिरदे दे कुसै संवेदनशील भावुक कोने च रोमांस गी इयां सम्हाली रखदे न जियां गलाबै दी त्रिखे कंडें आहली झाड़ी गलाबै दे कोमल-खूबसूरत फुल्लै गी बगैर कुसै किस्मै दी ओच लगने दे सांभी-सम्हाली रखदी ऐ। इस लेई एकांत भावुक खिनें च जिसलै अपनी प्रेमका चेतै औंदी ऐ तां उंदे हिरदे थमां कवता दे इयै-नेह पदें दा इक स्वतः स्फूर्त प्रवाह (a spontaneous flow) फुट्टी पौंदा ऐ :-

“रंग गलाबी तेरा चेहरा,

मस्त शबाबी तेरा चेहरा।

ओठ रसीले, नैन नशीले,
भला शराबी तेरा चेहरा।
त्रिम्बें-त्रिम्बें कुसनै घड़ेआ,
छैल कताबी तेरा चेहरा। (पीड़ें दी बरात, सफा 26)

ओ गीत मेरे/जिन्दे 'च तेरा/रूप ल'बदा ऐ/ओ गीत मेरे/जिन्दे चा तेरी/बास औंदी
ऐ/ओ गीत मेरे जिन्दे च छलकदा ऐ/शलैपा-गुहाड़ तेरा (चेतें दे सूरज मुखी-सफा-29)

पर अस दिक्खनेआं जे इयै ने 'इयां रोमांटक कवतां कवि दे जबानी दी बरेसा
च रची दियां न। सन् 1999 च छपे दे गजल संग्रह "दिल दरया खाली-खाली"
च आइयै कवि उधमपुरी च असें गी बुजुर्गी (maturity) भाव नजर औन लगी पौंदा
की जे इस अवस्था च आइयै ओह बड़े संभले दे से 'ई होंदे न। गजल दा एह शेर
इस तत्थ दा प्रमाण ऐ -

"इश्क प्यार दे दिन न थोढ़े,
कु'न जानै केह होना कल। (सफा-33)"

स्पष्ट ऐ जे हून कवि संसार दी अमारता गी समझी गेदा ऐ इसै करी हून
उच्चे जीवन मुल्लें दी तपासा पासै लग्गी पेदा ऐ।

कवि दा इक होर मशहूर काव्य संग्रह "इक शैहर यादें दा" सन् 1979 गी
छपेआ हा। एह इन्ना मकबूल होआ हा जे साहित्य अकादमी दिल्ली ने इसी पुरस्कृत
करियै इसदा स्हेई मूल्यांकन कित्ता हा। इसदे किश शेर सूफियाना अंदाज दे बी न
ते भारती दर्शन दी अकासी बी करदे न। उदाहरण लेई

"नां गै रात ऐ मेरी ते नां गै दिन बी मेरे,
पता निं कदूं मुक्कना ऐ सफर एह साहें दा अपना। (सफा-20)"
कैसी ए जिंदगी एह मेरी कैसा एह घेरा ऐ।
घरा चले तां न्हेरा हा, पुज्जेआं घर तां न्हेरा ऐ। (-सफा 86)

जियां के पैहलें विस्तार कनै जिकर आई चुक्केआ ऐ जे कवि उधमपुरी बेदना
दा कवि ऐ, इस लेई बेदना ते दर्द दा जिकर ओह चूंके अपनी हर रचना च करदा
ऐ, इस लेई "इक शैहर यादें दा" कविता संग्रह बी इस पैहलू दा अपवाद कियां
होई सकदा ऐ। कवि इस शैहर च अपने गम ते दर्द दा चित्रण करदे होई आखदा
ऐ जे ओह ते मेरे रोम-रोम च अचरी-बिचरी गेदा ऐ -

"गम बाबस्ता हे मेरे रोम-रोम कनै,
में उंदे स्हारै पलदा-मठोंदा रेहा।" (-सफा-66)

पर कवि बावजूद गम दे अत्थरूएं रोंदे होई बी अपने गम जां पीड़ गी अपने
अन्दर गै पचांदा किश नेई बोलदा ऐ ते अपने कर्तव्य-पालन दे रस्ते पर बदस्तूर
गामजन रौंहदा ऐ -

"अक्खीं च अत्थरू ते ओठें प चुप्पी,
अस सब्बै अपने बादे नभाई चलेआं॥(सफा-70)"

जियां के पैहलें बी जिकर कित्ता जाई चुक्के दा ऐ जे- कवि उधमपुरी हुंदी
रचना 'चाननी' डोगरी दा इक नेहा लघु काव्य ऐ जिसदे उप्पर हिन्दी दे युगप्रवर्तक
कवि जयशंकर प्रसाद दे लघुकाव्य 'अश्रु' दा स्पष्ट प्रभाव से 'ई होंदा ऐ। 400 पक्तियें
दे इस लघु काव्य च कथ्य सिर्फ 'चाननी' ते उसदे नेकां रूपें दी काव्यमयी व्याख्या
ऐ। कवि उंदा बर्णन रूपक, बिम्ब योजना ते केई प्रतीकें दे माध्यम कनै करदा ऐ।
जित्थें इस लघुकाव्य दे पदें च कवता दा स्वतः स्फूर्त प्रवाह नजर औंदा ऐ उर्थें भावें
दी गम्भीरता ते चित्रात्मक शैली बी बड़ी खूबसूरती कनै सामनै औंदी ऐ। इस रचना
च कवि ने सच्चें-मुच्चें गै अपना इक बक्खरा गै रूप दस्से दा ऐ। की जे डोगरी
बिच एह इक नमीं विधा दी रचना ऐ। इसै लेई जेकर इ'स्सी बी अस प्रसाद दे
छायावादी लघुकाव्य अश्रु आह्ला लेखा इक छायावादी रचना गै मन्नी लैचै तां बी
कोई अतिशयोक्ति नेई होग। लेख दे विस्तार दे डर कनै 'चाननी चा इक दो उदाहरण
उद्धृत करियै इस लेख गी अगौं बधानेआं :-

"गासै दी तूं बासनी, फी कैसी औना तूं।
गर्व भरोची लब्भनी, बड्डे घरे दी नूंह - (सफा-12)"
× × × ×
बसन्ती तेरा चोलड़ा, बसन्ती तेरा रूप।
आपें जे तूं बसन्त रितु, दिक्खैं कुंन सरूप॥ - (सफा-28)
× × × ×
कैसी निर्मल चाननी, करदी सुच्चा दान।
बुरा-भला नेई जानदी, सारै इक समान॥ (सफा-74)

इनें उदाहरणें कोला स्पष्ट होई जंदा जे चाननी च भाव पक्ख दी गै प्रधानता
ऐ ते प्रतीक विधान ते बिम्ब योजना बड़े सभावक रूप च चाननी काव्य दा शंगार

बनियै इसदी खूबसूरती गी चार चन्न लांदे न।

कवि उधमपुरी होरें जदूं सन् 1985 च अपने महाकाव्य 'जित्तो' गी प्रकाशत कित्ता हा तां इसदा दुग्गर समाज च बड़ा सुआगत होआ हा। इ'स्सी डोगरी दा पैहला महाकाव्य दा गौरव प्राप्त होने करी, इसदा नायक दुग्गर दा अमर शहीद बावा जित्तो होने करी ते इसदी नर्मा काव्य तकनीक ते भाशा दी खूबसूरत रवानगी होने करी इ'स्सी समालोचकें डोगरी काव्य साहित्य च इक मील पत्थर दी संज्ञा दिती ही। एह सच्च ऐ जे डोगरी दे इक होर होनहार कवि प्रकाश प्रेमी होरें बी उससै ब'रै अपने महाकाव्य-बेदन धरती दी'' रचना गी बी प्रकाशत कित्ता हा पर चूके 'जित्तो' 'बेदन धरती दी' कोला त्रै म्हीन्ने पैहलें पाठकें दे हत्थ आई गेआ हा, इस लेई उ'स्सैगी डोगरी काव्य साहित्य दा पैहला महाकाव्य मन्नेआं। इसदी काव्यकला, नर्मा तकनीक कथ्य ते बिशेवस्तु कन्नै पूरा-पूरा न्यांऽ, अमर शहीद बावा जित्तो दे अति संवेदनशील जीवन-प्रसंगें दा बड़ी संजीदगी कन्नै बर्णन बगैरा बशेशताएं दे कारण गै इससी जम्मू कश्मीर कल्चरल अकैडमी ने पुरस्कृत कित्ता हा।

रियासी दे कोल गहार ग्रां कोला मजबूर होइयै अपनी धी बुआ कौड़ी कन्नै हिजरत करदे मौकै बावा जित्तो दी मानसक अवस्था दा कवि मनोविज्ञानक बर्णन करदे होई आखदा ऐ -

इस ममता ने ममता मुक्की, चुक्केआ हिरख पराना।

होई गेआ ऐ देस पराया लगेआ सब बगाना ॥-(सफा117)

× × × ×

इस थाहरा दी ब्हा बी बदली, बदलेआ इत्थें पानी।

चेतें दे सब नाते रेही गे, मुक्की कत्थ परानी ॥ (उ'ऐ-117)

जिसलै सामे चक आइयै बावा जित्तो ने इक बंजर जमीना च खूब मैहनत करियै कनक पैदा कित्ती पर जिसलै जगीरदारै दे (वीर सिंह दे) ऐहलकार उसदे खलाड़े च पेदे पूरे ढेरै उप्पर गै कब्जा करनै आस्तै त्यार होई जंदे न तां उस ना बरदाशत बेन्याई दे बरुद्ध जित्तो करलाई उठदा ऐ -

अक्खीं बिच्च हे मकदे लोरे, चढ़ेआ मूंह जलाल।

दाना बी इक छूहै कोई, कुसदी अज्ज मजाल (सफा-202)

जित्तो दे उस रूप गी दिक्खियै उत्थें आई खड़ोते दे जगीरदारै दे करिंदे दे सपाही बिंद डरदे जंरूर न पर मालकै दे हुक्म दी तमील करने आस्तै जिसलै बंजिद

गे होई जंदे न, ते दानें दी छट्टां भरन लगी पौंदे न। उसलै जित्तो अपना कटारा बाहर कडिड्यै शेरें आहला लेखा गर्जन लगी पौंदा ऐ -

रोह अंगारे लट-लट बलदे, लहु बुआले खंदा।

इक बक्खी सब भाई खड़ोते, अगैं कोई निं जंदा।

पाड़ी-चोरी स'ब्बे छट्टां, लाया नाजै ढेर।

लेई कटारा जित्तो फिरदा, अशकै बिम्बलै शेर।

सच्च दे अज्ज कलेजे कम्बे, गेई तां चुप्पी छाई।

फुसर-फुसर तां करन लगे न, रलियै सब सपाही। (उ'ऐ सफा-208)

पर खीर जिसलै जित्तो दी उनें अत्याचारियें अगैं कोई पेश नेई चलदी ऐ तां ओह अपना कटारा अपने ढिड्डे च खोहबी दिंदा ऐ ते उसदे चा निकली लहुए दी धार सारी कनका गी लहुलुहान करी दिंदी ऐ। कवि उस भेंकर ते दर्दनाक दक्ख दा बर्णन करदे होई शब्द चित्तर पेश करी दिंदा ऐ -

मेरा लहु ते सूहा मैहतेआ, तेरी रत्त ऐ-चिट्टी।

दिन्ना तुक्की रत्त रलाई, खायां कनक निं रुक्खी।

कनक लेई मत्थे नै लाई, चुम्मेआ तेज कटारा।

त्राहियै नस्सेआ वीर सिंह ते, सपाही छप्पेआ धारा। (उ'ऐ सफा-208)

मां दुर्गा दा नां ध्याई खाई कटारा मरेआ,

इक बारी फी दिक्खो लोको, ईसा सूली चढ़ेआ।

बिच्च खलाड़ै जित्तो तड़फै, गेई कनक रंगोई,

फी इक बारी सुच्चे लहुए, धरत गेई चतरोई ॥ (उ'ऐ सफा-209)

कवि उधमपुरी ने इस काव्य च काव्य शास्त्र दे सिद्धान्तें कोला बिंद हटियै शिल्प विधान ते शैली अपनाई दी ऐ। महाकाव्य दे हर सर्ग दे अन्त च छन्द बदली जंदा ऐ जद के जित्तो महाकाव्य च शुरू कोला लेइयै खीर तक इक्कै छंद चलदा ऐ। काव्य शास्त्र दे सिद्धान्त दे मताबक महाकाव्य च जां शृंगार ते जां वीर रस गै प्रधान रस होंदा ऐ जद के बाकी अंग अर्थात् रस गौण रूप च बरते जंदे न। जित्तो च कवि करुण ते वीर रस दौनीं गी कन्ने-कन्ने चलांदा ऐ। काव्य च कुतै-कुतै प्रतीक विधान ते बिम्ब योजना बी बड़ी खूबसूरती कन्नै आई दी ऐ। पूरे काव्य च भाव पक्ख दी प्रधानता होने करी इक स्वतः स्फूर्त प्रवाह (Spontaneity) ऐ। भाएं कला पक्ख बी पिच्छें-पिच्छें चलदा ऐ। भाशा सरोखड़ ते ठेठ डोगरी ऐ।

एह इक तत्थ ऐ जे समाजक क्रांति दै बारे च उ'ऐ कवि जां लेखक सोची सकदा ऐ जिन आपू दुख तकलीफां, पीड़ां, प्रताड़नां ते अपने गै लोकें कोला उपेक्षा भाव दियां पीड़ां झल्ली दियां होन ते फही अपने उस भोगे दे यथार्थ गी समाजक यथार्थ बिच्च खपाए दा होऐ। पिछले पैराग्राफें च किती दी चर्चा दी लोई च कवि उधमपुरी इस कसौटी उपर पूरी चाल्ली खरा उतरदा ऐ। ओह तां गै - "इक क्रांति इक रुमाल" शीर्षक आली अपनी कवता च समाजक क्रांति दी पैरोकारी करने दी सकत रखदा ऐ -

दिया दान नेई मंगना/भिक्ख नेई लैनी/रुट्टी नेई मंगनी/ओ मेरा हक्क ऐ/मेरा हिस्सा.../में अपना हिस्सा/चोरन निं देना/बगावत/हां, बगावत गै/अज मेरा नारा ऐ।

(किश कलियां तेरे नां सफा-27)

कवि पखंडवाद झूठ ते छल-छिद्दर दा सख्त बरोधी ऐ ते सचाई दा पक्ख-पाती ऐ-

-सच्चै गी तूं सच्च गलाऽ हां,

खोहल मरहक्खे, तुआर नकाव। (किश कलियां तेरे नां सफा-28)

कवि उधमपुरी ने एह गल्ल बड़े फखर कनै आखी दी ऐ जे इतिहास दे ब'रके फरोलियै दिखचै तां असंगी कुतै बी डोगरें दी नां ते कोई बुजदिली आहली मसाल मिलदी ऐ ते नां गै कुसै बदनामी आहले कारनामें दी -

"इतिहास दे ब'रकें फरोल डोगरें दी बीरता,

बुजदिली दी इक बी घटना, मसाल दे" (पीड़ें दी बरात, सफा-60)

(१०९) 'गीत गंगा' कवि दा भक्ति भाव भरोचे गीतें दा संग्रह ऐ। केइयें गीतें च भक्ति ते ज्ञान दा मिश्रत रूप बी मिलदा ऐ। किश गीतें उपर कबीर-वाद दा स्पष्ट प्रभाव लभदा ऐ। इस रचना दी भूमका च डॉ० चम्पा होर लिखदियां न जे इस संग्रह दे किश गीतें उपर सूफीमत दा प्रभाव ऐ। पर में डॉ० चम्पा हुंदे मत कनै सैहमत नेई आं की जे सन्त कबीर जिसलै एह आखदा ऐ -

"लाली मेरे लाल की जित देखूं तित लाल।

लाली देखन मैं गई, मैं भी हो गई लाल॥"

एह तत्थ स्पष्ट होई जंदा ऐ जे कबीरबाद आत्मा गी प्रेमका ते उस ब्रह्म गी प्रेमी मनदा ऐ। इस थमां उल्ट सूफी मत आहले आत्मा गी प्रेमी ते परमात्मा गी प्रेमका

दे रूप च चित्रत करदे न। प्रसिद्ध सूफी कवि मलिक मोहम्मद जायसी दा महाकाव्य पद्मावत इस तत्थ दा प्रमाण ऐ। पद्मावत दा नायक राजा रत्न सेन आत्मा दा प्रतीक ऐ जद के उसदी प्रेमका रानी पद्मावती परमात्मा दा प्रतीक ऐ।

कबीर आहला लेखा कवि उधमपुरी दी आत्मा बी प्रेमका दे रूप च अपने प्रेमी प्रभु दे अगैं प्रार्थना करदे होई आखदी ऐ जे हे मेरे स्वामी, बावजूद नेकें दोशें दे मिगी अपनी शरणी च लेइयै मेरा उद्धार करो। मेरे च भाएँ कोई बी गुण नेई ऐ तां बी में तुंदी गै आं। इस लेई मिगी अपने अलिङ्गन च लेई लैओ-

लेई लो अपनी बाहमें अन्दर, नां कोई रूप ना गुण ऐ कोई।

नां गै मेरी उज्जल काया, फी बी अड़ेओ तुंदी होई।

देओ हां मेरा बेड़ा तारी, किन्ने बारी अर्ज गुजारी। (गीत गंगा, सफा-71)

"रौहना अज्जै दी रात असें, आया स्नेहा कैते दा, पुटो झुंड दनाक, में इक ऐसी बदली, जोगी गे परदेस ते मन चप्पू, तन मछुआ मेरा" बगैरा कवतां इसै श्रेणी च औंदियां न।

अस दिक्खनेआं जे कवि अगैं चलियै भक्ति थमां ग्यान पाससै बधी जंदा ऐ-

"चादर जेकर कोरी चिट्टी,

फही झूठे सब पूजा जाप। (दिल दरया खाली-खाली-सफा-52)

गजल दे इस शेऽर उपर हिन्दी दी प्रसिद्ध कवयित्री महादेवी वर्मा दी रहस्यवादी कविता दे इस बन्द दा स्पष्ट प्रभाव ऐ -

"क्या पूजा क्या अर्पण रे

उस असीम का सुन्दर मन्दिर

मेरा लघुतम जीवन रे।"

एह बी इक सर्वमान्य तत्थ ऐ जे अस उस कवि जां लेखक गी गै प्रतिनिधि कवि जां लेखक मन्ने आं जिसदे च युग-बोध दी पूरी-पूरी क्षमता होऐ। इत्थें उधमपुरी हुंदी ताजा तरीन रचना दिल दरया खाली-खाली च आतंकवाद दे संदर्भ च रची दियें गजलें दे किश शेऽर प्रस्तुत करियै कवि दी युगबोध दी जागरूक क्षमता दे बारे च स्पष्ट किता जंदा ऐ। वर्तमान समें च जिसलै आतंकवाद दे राक्षस ने लगभग सारी दुनिया गी पूरी चाल्ली त्रस्त करियै तड़फाट च पाई दिते दा ऐ ते फही साढ़ी

रियास्ती गी ते मानो आतंकवादी राखस ने अपने खूनी पञ्जै कन्नै गै पकड़ी लेदा ऐ, उसलै युगवोध दे प्रति चतन्न कवि उधमपुरी जनेहा कवि कियां चुप्प रेही सकदा ऐ? ओह समाज गी आतंकवाद दे प्रति सचेत करदे होई अमन दा बास्ता दिंदा आखदा ऐ -

जीन देओ हुन मानवता गी,
 नेई बरूदी फसलां राहो।
 खून खराबा बंजर धरती,
 कोई अमन पनीरी लाओ। (दिल दरया खाली खाली सफा-94)

उप्पर दिते दे सर्वेक्खन कोला एह स्पष्ट होई जंदा ऐ जे कवि उधमपुरी डोगरी दा इक नेहा संवेदनशील कवि ऐ जिसदी कवता च बिशें दी विविधता ते नमांपन, कवता दा नोखा सन्हाकड़ा गुहाड़, ते त्रिक्खापन, हिरदे स्पर्शी भावें दी मुग्धता बिशें दे मताबक बिम्ब-योजना, वेदना ते दर्द दा केइयें रूपें च चित्रण, रोमांस, भक्ति ते अध्यात्म दा वेदान्ती ते कबीर पंथी रूप, देशभक्ति, ते डुग्गर ते डोगरी कन्नै अनसंभ प्यार, प्राकृतक घटके च छायावादी रूप दे शब्द चित्र तुआरने दी तांहग बगैरा नेकां रूप ल'बदे न।